

**Puteri UMNO cabar Nurul Izzah buat kenyataan umum, kemuka saman
Utusan Online
28 April, 2012**

KUALA LUMPUR 27 April - Pergerakan Puteri UMNO mencabar Ahli Parlimen Lembah Pantai, Nurul Izzah Anwar supaya mengemukakan saman fitnah dan membuat kenyataan umum bagi mendakwa Datuk Shazryl Eskay Abdullah sebagai pembohong besar berhubung isu video seks yang didakwa melibatkan Ketua Pembangkang, Datuk Seri Anwar Ibrahim.

Ketuanya, Datuk Rosnah Abdul Rashid Shirlin berkata, langkah itu perlu jika Nurul Izzah yang juga anak kepada Penasihat Parti Keadilan Rakyat (PKR) tersebut benar-benar mahu menegakkan kebenaran dan mempertahankan bapanya.

Menurut beliau, sepatutnya tindakan segera telah diambil Nurul Izzah memandangkan isu terbabit melibatkan maruah bapa dan keluarganya.

"Puteri UMNO percaya sudah tiba masanya untuk Nurul Izzah berhenti daripada 'berlakon' kerana yakin beliau tidak akan berani untuk menyaman ataupun membuat kenyataan tersebut," katanya dalam satu kenyataan di sini hari ini.

Menurut Rosnah, tindakan Ahli Parlimen itu mempertahankan Anwar dan wanita yang dikaitkan mempunyai hubungan sulit dengan bapanya itu, Shamsidar Taharin baru-baru ini juga menimbulkan tanda-tanya mengenai sejauh mana kejujuran beliau menyatakan pendiriannya.

"Puteri UMNO ingin bertanya kepada Nurul Izzah, apakah tindakannya itu kerana didesak atau dipaksa oleh Azmin Ali (Timbalan Presiden PKR), suami Shamsidar ataupun setelah mendapat persetujuan daripada ibunya, Datin Seri Dr. Wan Azizah Wan Ismail terlebih dahulu," katanya.

Jelas Rosnah, Puteri UMNO sememangnya amat tertarik dengan tindakan dan 'lakonan politik' Nurul Izzah serta tidak sabar untuk menanti detik tamatnya sandiwara tersebut.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0428&pub=Utusan_Malaysia&sec=Politik&pg=po_04.htm